

ტორპედო გვჯობდა ყველაფრით

თბილისი. “ლოკომოტივის” სტადიონი. 1 ივლისი.

“დინამო” (თბილისი) - “ტორპედო” (მოსკოვი) - 0:2 (0:2).

“დინამო”: ურუშაძე, ძოძუაშვილი, ჭელიძე, ხურცილავა, ებრალიძე, პეტრიაშვილი (მეტრეველი), კუტივაძე (გავაშელი), მაჩაიძე, ყიფიანი, გ. ნოდია, ლ. ნოდია.

“ტორპედო”: ბანიკოვი, ჩუმაკოვი, ჰახომოვი, კრასნოვი, იურინი, შუსტიკოვი, დეგტიარევი, ჰაისი, სმირნოვი, ნიკონოვი (იანეცი), ფეტისოვი.

მსაჯი: ი. პონომარიოვი (კიშინიოვი).

როცა ცნობილი გახდა ფეხბურთის საკავშირო ფედერაციაში მომხდარი კენჭისყრის შედეგი იმის თაობაზე, რომ თბილისის “დინამოს” თასის მეოთხედფინალის მოგების შემთხვევაში მოსკოვის “ტორპედოსთან” ნახევარფინალის უნდა ეთამაშა მონწილეობის მინდორზე როსტოვში ან დონეცკში, გულშემატკივართა შორის დავა იყო იმის თაობაზე, თუ სად ჯობდა თამაში - როსტოვში თუ დონეცკში. უმეტესობა ამჯობინებდა როსტოვს.

გულშემატკივრებს საკმაოდ გააჩნდათ არგუმენტები საიმისოდ, რომ მეოთხედფინალის “ტორპედოსთან” განვლილ ეტაპად მიეჩნიათ. ჯერ ერთი, ჩვენი გუნდი ტორპედოელებთან ყოველთვის კარგად თამაშობს, მეორეც - მოსკოველები წლებადღე ჩემპიონატში ერთობ წარუმატებლად გამოდიან, ამასთან ძალზე “უკბილოდ” გამოიყურებიან. “ტორპედო” ცხრილის მეორე ნახევარშია, თითქმის სახიფათო ზონაში, 13 კალენდარულ მატჩში გატანილი აქვს ყველაზე ცოტა ბურთი უმაღლესი ლიგის გუნდებს შორის - 4 და საერთოდ, ჩემპიონატის 9 შეხვედრა ისე ჩაატარა, რომ მინდვრიდან უგოლოდ წავიდა.

ასეთი “ტორპედო”, რალაც არ გვახსოვს ბოლო წლებში და შეიძლება ამ გარემოებამ “საავანსო” თვითდამშვიდება გამოიწვია ჩვენს ფეხბურთელებში. აბა, რა უნდა გვიქნას გუნდმა, რომელსაც 4 თამაშში თითო ბურთიც ვერ გააქვს, რისი იმედი უნდა ჰქონდეს ჩვენს სტაბილურად შეთამაშებულ დაცვასთან?

მაგრამ ყველამ კარგად იცის, რომ თასის თავისი კანონები აქვს. წინასწარ შემუშავებული რეცეპტები და უეჭველი პროგნოზები აქ არავის გამოადგება. დამშვიდება და საქმის მოთავებულად ჩათვლა შეიძლება მხოლოდ მაშინ, როცა მსაჯი ბოლო სასტვენს მისცემს და თამაშს დაამთავრებს, ხოლო მანამდე საჭიროა ბრძოლა, შეუპოვარი, ენერგიული, დაუღალავი ბრძოლა.

დინამოელებმა კი არ იბრძოლეს. პირველი წუთიდან მოყოლებული 45-მდე 11 ფეხბურთელი ისე უხალისოდ, ინერტულად, უგულოდ დადიოდა მინდორზე, თითქოს მათ რალაც არაჩვეულებრივად მოსაწყენი, მოსაბეზრებელი სხვისი საქმის შესრულება მიანდევს და ამით დიდად შეანუხეს. შეიძლება ისინი ასეთივე სუსტ თამაშს მოელოდნენ ტორპედოელთა მხრივ და არ მიაჩნდათ საჭიროდ ბრძოლა იმ დონეზე, ძალების ისეთი ხარჯვა, როგორმაც მათ ამას წინათ “ნეფთჩისთან” მოუწიათ. მაგრამ საკმაოდ სერიოზული სიგნალი ასეთი თამაშის აუცილებლობისთვის მიიღეს მაშინვე, როგორც კი მატჩი დაიწყო. მიმდინარეობდა მე-2 წუთი. მოსკოველებმა მარჯვნიდან მიანოდეს კუთხური, ჰაისმა დაარტყა კარში და ურუშაძემ იოლი ბურთი გაუშვა ძელის მახლობლად. სმირნოვს გოლის გასატანად თითქმის აღარაფერი დასჭირვებია, ვინაიდან მან ბურთს ზედ კარის ხაზზე მიუსწრო - 1:0.

რა გააკეთეს ამის მერე დინამოელებმა? არაფერი. ინიციატივის აღება საკუთარ თავზე, პირადი მაგალითის მიცემა, ტემპის მომატება არ უფიქრია არავის. ყველა რგოლი უკლებლივ ძალზე ცუდად თამაშობდა, იკარგებოდა უამრავი გადაცემა, თავდასხმა და ნახევარდაცვა სისტემატურად კარგავდა ბურთს, მოქმედებდა მხოლოდ ინდივიდუალურად და ამ მხრივაც ჩამორჩებოდა მეტოქეს.

ამასობაში “ტორპედო” სულ უფრო უმატებდა თამაშს. მისი ყოველი ფეხბურთელი მობილიზებული და ბრძოლისუნარიანი იყო, კომბინაციები სრულდებოდა სწრაფად, დაუყოვნებლად, ტაქტიკურად გამართულად. აქ აუცილებელი აღნიშვნის ღირსად მივიჩნევთ იმ ფაქტს, რომ გუნდის მწვრთნელმა ვ. მასლოვმა თავდასხმის მთავარი ცენტრალური ტანდემი გერშკოვიჩი-შალიმოვი არ გამოიყვანა მინდორზე, მხოლოდ შემცვლელ მოთამაშეებად ჩანერა ოქმში და მათი ადგილი მიანდო ახალგაზრდა თავდამსხმელებს - სმირნოვსა და ნიკონოვს. ორივე ფეხბურთელმა გაამართლა მწვრთნელის იმედები და პაისტან და ფეტისოვთან ერთად შექმნა ძლიერი შეტევა, რომლის წინაშეც დინამოელთა დაცვა უძლური აღმოჩნდა.

35-ე წუთზე სტუმრებმა მორიგი კომბინაცია გაითამაშეს თბილისელთა საჯარიმო მოედანზე. სმირნოვი პირისპირ დარჩა ურუშაძესთან და ზუსტად გაგზავნა მეორე ბურთი ბადეში.

2 გოლი! ეს ისეთი ფორაა, რომლის გაქვითვას თავგანწირული ბრძოლა სჭირდება. სიმართლე არ იქნება ვთქვათ, რომ დინამოელები მეორე ტაიმში არ იბრძოდნენ, რა თქმა უნდა, შესვენების შემდეგ ისინი გაცილებით უკეთ გამოიყურებოდნენ, ვიდრე მანამდე. გაძლიერდა თამაში შუა მინდორში, მოიმატა შეტევის სიხშირემ და სიმწვავემ (რად ღირს, თუნდაც, ბანიკოვის მიერ აღებული ორი უიმედო ბურთი ხურცილავასგან, რისთვისაც მან გაზეთ “ახალგაზრდა კომუნისტის” რედაქციის მიერ დაწესებული პრიზი მიიღო). მაგრამ პირველი ტაიმის უმოქმედობა გუნდს ძალზე ძვირად დაუჯდა. ტორპედოელები კი მეორე ტაიმშიც ისევ საუცხოოდ თამაშობდნენ და თუ საგოლე მომენტებზე მიდგა საქმე, მათ ისინი საკმაოდ შექმნეს. ერთხელ, მაგალითად, ჭელიძეს მოუხდა ურუშაძის მიერ დატოვებული კარის გადარჩენა, ხელსაყრელი მდგომარეობანი ჰქონდათ პაისტს, ფეტისოვს, სმირნოვს. ასე რომ უკეთესად ჩატარებული მეორე ტაიმი მაინც ვერ გააქარწყლებს იმ უკიდურესად ცუდ შთაბეჭდილებას, რომელიც ჩვენმა გუნდმა დატოვა ამ მატჩში.

არავითარ შემთხვევითობას ადგილი არა ჰქონია. გაიმარჯვა იმ გუნდმა, რომელმაც უფრო ძლიერად ითამაშა, ეს კი “ტორპედო” იყო. ახლა ტორპედოელებმა და მათმა გულშემატკივრებმა უნდა იდარდონ, რომ ნახევარფინალის მატჩი კენჭისყრამ როსტოვში გაამწესა. ჩვენ, როგორც იტყვიან, “თავისუფალნი” ვართ ამ სადარდელოსგან.

ბ. ქორქია.

“ლელო”, 3 ივლისი, 1971 წ.